



DEPUTACIÓN PROVINCIAL
A CORUÑA

SERVIZO DE PATRIMONIO E CONTRATACIÓN

//ABANCA

Número

83

/2025

CONVENIO DE COLABORACIÓN ENTRE A DEPUTACIÓN DA CORUÑA E A ENTIDADE ABANCA CORPORACIÓN BANCARIA S.A PARA A ENTREGA E DISTRIBUCIÓN DOS FONDOS DAS AXUDAS DO PROGRAMA DE APOIO AO COMERCIO LOCAL NOS CONCELLOS DA PROVINCIA DA CORUÑA DE MENOS DE 20.000 HABITANTES.

Na Coruña, a 19 de setembro de 2025, na sede da Deputación Provincial da Coruña

Ante min, Miguel Iglesias Martínez, Secretario Xeral da Deputación Provincial da Coruña, como fedatario actuante

REUNIDOS:

Dunha parte, Dona Rosa Ana García López, en representación da Deputación Provincial da Coruña, actuando en exercicio das competencias que ten atribuídas polo artigo 34 da Lei 7/1985, do 2 de abril, reguladora das bases do réxime local.

Doutra, Don Álvaro Manuel Rodríguez Cabo, na súa calidade de representante de ABANCA CORPORACIÓN BANCARIA, S.A.

Actuando no exercicio dos seus respectivos cargos e na representación que ostentan, e recoñecéndose reciprocamente capacidade para obrigarse nos termos deste documento

EXPOÑEN:

Primeiro. Que a Excm. Deputación provincial da Coruña, no marco das súas competencias de cooperación cos concellos e vertebración do territorio, considera prioritario apoiar accións que contribúan ao mantemento da actividade económica no ámbito rural, especialmente naqueles concellos con menor poboación.

Segundo. Para acadar este obxectivo, en liña co seu compromiso co desenvolvemento equilibrado da provincia, impulsa esta iniciativa de dinamización do consumo local nos concellos de menos de 20.000 habitantes, como medida complementaria a outras políticas públicas de diferentes ámbitos.

Terceiro. A entidade ABANCA CORPORACION BANCARIA S.A, conforme o disposto no procedemento de selección dunha entidade colaboradora para a xestión e execución do Programa de Apoio ao

Comercio Local nos concellos de menos de 20.000 habitantes da provincia da Coruña, resultou seleccionada como entidade financeira colaboradora na entrega e distribución dos fondos provinciais do programa.

Cuarto. Que dado o interese coincidente da Deputación da Coruña e de ABANCA CORPORACION BANCARIA S.A, no marco dos seus fins e competencias, ambas partes, por razóns de eficacia na xestión e co fin de conseguir unha mellor prestación dos servizos ás persoas beneficiarias das axudas, e de conformidade cos artigos 9 e 13 da Lei 9/2007, do 13 de xuño, de subvencións de Galicia, acordan subscribir o presente convenio de colaboración de acordo coas seguintes

CLÁUSULAS:

Primeira. Obxecto

Este convenio ten por obxecto establecer as bases de colaboración entre as partes asinantes para a xestión e distribución das axudas do Programa de Apoio ao Comercio Local nos concellos de menos de 20.000 habitantes da provincia da Coruña.

Segunda. Entidade colaboradora

ABANCA CORPORACION BANCARIA S.A é unha entidade colaboradora que cumpre co disposto no procedemento para a selección dunha entidade colaboradora para a entrega e distribución dos fondos das axudas do programa de Apoio ao Comercio Local nos concellos da provincia da Coruña de menos de 20.000 habitantes.

Terceira. Depósito dos fondos públicos

Para dar cumprimento ao disposto no número 1 da cláusula quinta, a Deputación da Coruña depositará os fondos públicos destinados ao Programa na seguinte conta bancaria da entidade financeira colaboradora: ES10 2080 7208 3285 3000 0089. O depósito farase co concepto «Fondos do Programa de Apoio ao Comercio Local nos concellos da provincia de menos de 20.000 habitantes».

Cuarta. Compensación económica e constitución de garantías

A compensación económica a favor de ABANCA CORPORACION BANCARIA S.A polos gastos de posta en funcionamento, seguimento e control do Programa de apoio ao comercio local nos concellos de menos de 20.000 habitantes é de 72.600,00 € (IVE incluído), financiados con cargo á aplicación orzamentaria 0520/92052/22799 do Orzamento da Deputación correspondente á anualidade 2025, coa posibilidade de incrementar a dita compensación, se o aconsellan razóns económicas debidamente xustificadas, a través da subscrición da correspondente addenda.

O pagamento da compensación económica farase á entidade financeira colaboradora, unha vez finalizado o Programa, na seguinte conta bancaria: ES10 2080 7208 3285 3000 0089.

En atención ás características da colaboración e á solvencia da entidade, a entidade colaboradora está exenta de constituír as garantías previstas na Lei 9/2007, do 13 de xuño, de subvencións de Galicia.

Quinta. Obrigas da Deputación

A Deputación da Coruña comprométese a:

1. Librar o crédito necesario para realizar o pagamento dos bonos trocados dentro do período subvencionable establecido nas correspondentes bases da convocatoria do programa.
2. Definir a imaxe do programa en todos os soportes físicos e dixitais.
3. Facilitar o contido das declaracións das altas dos comercios e das persoas usuarias, así como das autorizacións expresas en materia de protección de datos nos termos que se establezan nas bases da convocatoria do programa e neste convenio.
4. Autorizar as liquidacións con carácter previo á súa transferencia.
5. Compensar os gastos en que incorra a entidade colaboradora ao abeiro do artigo 13.2.m) da Lei 9/2007, do 13 de xuño, de subvencións de Galicia.

Sexta. Obrigas da entidade colaboradora

A entidade colaboradora, sen prexuízo do disposto no artigo 12 da Lei 9/2007, do 13 de xuño, de subvencións de Galicia, e do establecido na Resolución pola que se convoca o procedemento de concorrência competitiva para a selección dunha entidade financeira colaboradora para a xestión do programa de Apoio ao Comercio Local nos concellos da provincia de menos de 20.000 habitantes, obrígase ao seguinte:

1. Entregar e distribuír as axudas do programa mediante a habilitación dunha plataforma tecnolóxica específica e das aplicacións informáticas máis axeitadas para a posta en marcha, a eficaz execución e o seguimento do programa, de tal forma que permita ter un seguimento, control e rastrexabilidade da emisión dos bonos, da súa troca nos comercios adheridos e do seu pagamento, de acordo coas previsións establecidas na cláusula sétima.
2. Ter operativas a plataforma e/ou aplicacións informáticas, habilitando o procedemento operativo antes da entrada en vigor da orde de convocatoria do programa.
3. Utilizar a imaxe do programa definida pola Deputación da Coruña en todos os soportes físicos e dixitais.
4. Por á disposición da Deputación da Coruña os seguintes informes:
 - Persoas usuarias dadas de alta no programa.
 - Comercios dados de alta no programa.
 - Número de bonos descargados (localidade, provincia).
5. Ser a depositaria dos fondos transferidos e entregar e distribuír os fondos públicos aos comercios adheridos ao programa, sen ningún custo ou requisito adicional dos previstos no programa e con independencia de que sexan clientes/as da entidade, cunha periodicidade semanal.

Estes fondos en ningún caso se considerarán integrantes do seu patrimonio.

6. Xestionar, controlar e supervisar o correcto destino dos fondos depositados na conta para o programa e, de ser o caso, coas instrucións específicas dadas pola Deputación da Coruña.

7. Informar do saldo dispoñible dos bonos unha vez alcanzada a súa data de caducidade ou na fin do programa coa finalidade de realizar o reembolso dese saldo, se é o caso, á Deputación da Coruña.

8. Comunicar á Deputación da Coruña, a través do correspondente ficheiro, as operacións de liquidacións e transferencias de aboamento realizadas, cunha periodicidade semanal.

9. Reintegrar os fondos públicos no suposto de incumprimento dos requisitos e obrigas establecidas para a concesión da subvención e, en todo caso, nos supostos regulados no artigo 33 da Lei 9/2007, do 13 de xuño, de subvencións de Galicia.

10. Cumprir, en materia de protección de datos, o Regulamento (UE) nº 2016/679 do Parlamento Europeo e do Consello, do 27 de abril de 2016 (en diante RXPd), relativo á protección das persoas físicas no que respecta ao tratamento de datos persoais e á libre circulación destes datos, a Lei orgánica 3/2018, do 5 de decembro (en diante LOPdGDD), de protección de datos persoais e garantía dos dereitos dixitais, e as demais disposicións vixentes sobre a materia.

Deberase manter a xestión das bases de datos do programa ao marxe das bases de datos da clientela da entidade financeira, e non se poderán utilizar para ningún fin distinto da propia administración e xestión dos bonos.

11. Dispoñer de libros e rexistros contables para facilitar a adecuada xustificación da subvención e a comprobación do cumprimento das condicións establecidas.

12. Someterse ás actuacións de comprobación e control financeiro dos órganos competentes da Deputación da Coruña e da Administración autonómica, estatal e comunitaria no exercicio das súas funcións.

13. Cumprir cos requisitos e obrigas establecidas na Lei 9/2007, do 13 de xuño, de subvencións de Galicia e, particularmente, nos seus artigos 10 e 12, así como no Decreto 11/2009, do 8 de xaneiro, polo que se aproba o Regulamento da Lei de subvencións de Galicia.

Sétima. Operativa da xestión das axudas

– A entidade colaboradora habilitará as aplicacións informáticas tecnicamente máis axeitadas para dar de alta as persoas usuarias, identificando respecto de cada unha delas a información que se estableza nas bases da convocatoria do programa e, en todo caso, a seguinte:

- Nome e apelidos.
- Maioría de idade.
- DNI/NIE.

- Localidade de residencia (código postal).

- Número de teléfono móbil.

- Correo electrónico.

– Habilitación da solución técnica para a descarga dixital dos bonos por parte das persoas usuarias.

Cada persoa usuaria disporá dos bonos que se establezan nas bases da convocatoria do programa, que poderán ser usados en un ou varios dos comercios retalistas adheridos ao programa. A súa aplicación efectuarana os propios establecementos, e para tal efecto a entidade colaboradora habilitará os mecanismos e canles necesarias.

Cada bono terá o valor determinado nas bases reguladoras da convocatoria do programa. O dito importe irase reducindo en función do valor da compra de acordo cos criterios establecidos nas citadas bases.

O período de validez dos bonos será o establecido nas bases reguladoras da convocatoria do programa.

O uso da aplicación e a descarga dos bonos polas persoas usuarias suporá a aceptación das condicións do seu uso e da política de privacidade, conforme o RXPd e a LOPDGDD.

Para estes efectos, por medio dunha declaración responsable as persoas usuarias deberán manifestar, baixo a súa responsabilidade, que cumpren cos requisitos establecidos nas bases correspondentes e que os datos indicados son certos. Así mesmo, deberán constar as autorizacións correspondentes en materia de protección de datos persoais nos termos que se establezan nas bases da convocatoria do programa e neste convenio.

– A Deputación da Coruña, mediante convocatoria pública, establecerá o prazo para que os comercios retalistas interesados en adherirse ao Programa de Apoio ao Comercio Local se dean de alta na aplicación tecnolóxica habilitada para tal efecto pola entidade colaboradora.

Na alta dos comercios deberá quedar constancia da información que se estableza nas bases da convocatoria do programa e, en todo caso, a seguinte:

- Nome e apelidos/razón social.
- Domicilio fiscal.
- NIF/CIF.
- Nome, apelidos e DNI/NIE da persoa representante.
- Nome comercial, no seu caso.
- Enderezo do establecemento comercial para o que se solicita a adhesión.
- Número de teléfono móbil.
- Correo electrónico.
- IAE.
- IBAN da conta bancaria.
- Páxina web do establecemento comercial, no seu caso.

A alta e o uso da aplicación polas persoas comerciantes suporá a aceptación das condicións e obrigas do programa e da política de privacidade, conforme o Regulamento (UE) nº 2016/679 do Parlamento Europeo e do Consello, do 27 de abril de 2016, relativo á protección das persoas físicas no que respecta ao tratamento de datos persoais e á libre circulación de estes datos e polo que se derroga a Directiva 95/46/CE (Regulamento xeral de protección de datos), e a Lei orgánica 3/2018, do 5 de decembro, de protección de datos persoais e garantía dos dereitos dixitais, da que serán informadas convenientemente.

Para estes efectos, as persoas comerciantes deberán asinar dixitalmente unha declaración responsable manifestando o cumprimento das condicións establecidas e a veracidade dos datos indicados.

O importe máximo de bonos que poderá trocar cada empresa establecerase, de ser o caso, nas bases da convocatoria do programa.

A entidade colaboradora habilitará o sistema de funcionamento e troca dos bonos de tal forma que queden rexistrados o importe e o concepto da compra, a identificación do bono e o importe descontado.

A entidade colaboradora deberá entregar e distribuír aos comercios, na conta bancaria indicada para tal efecto, os importes trocados.

Oitava. Relación con terceiros

A subscripción deste convenio non comporta relación laboral, contractual ou de calquera outro tipo entre os profesionais que desenvolvan as actividades e a Deputación da Coruña, de tal xeito que non se lle poderá exixir responsabilidade ningunha, nin directa, nin indirecta, nin subsidiaria, polos actos ou feitos acaecidos no seu desenvolvemento.

Novena. Inspección

A Deputación da Coruña, como responsable do programa, reserva para si o dereito de realizar, a posteriori e de forma aleatoria, cantas comprobacións, inspeccións e demais medidas de control considere oportunas para asegurar a correcta aplicación dos recursos públicos e para verificar o adecuado desenvolvemento e execución do programa de subvencións.

No suposto de que exista algún incumprimento por parte dos establecementos adheridos, a Deputación da Coruña poderá cancelar a súa adhesión ao Programa comunicando a dita circunstancia á entidade colaboradora a fin de impedir o troco e pagamento dos bonos.

Os comercios retallistas adheridos están obrigados a facilitar canta información lles sexa requirida pola Deputación da Coruña e os restantes órganos de control no exercicio das súas funcións de fiscalización do destino das axudas.

Décima. Modificación e resolución

Modificación:

Toda alteración das condicións que se deben ter en conta para a subscripción deste convenio poderá dar lugar á súa modificación, nos termos previstos no artigo 64 do Real decreto 887/2006, do 21 de xullo, polo que se aproba o Regulamento da Lei 38/2003, do 17 de decembro, xeral de subvencións.

As devanditas modificacións deberán formalizarse a través da correspondente addenda e someterse aos requisitos previstos no citado artigo 64 do Real decreto 887/2006, do 21 de xullo.

Resolución:

Serán causas de resolución do convenio as seguintes:

- O acordo expreso e escrito das partes.
- O incumprimento total ou parcial por algunha das partes de calquera das prescricións contidas no convenio.
- A denuncia escrita formulada por calquera das partes.
- O transcurso do tempo estipulado sen que se culminen as actividades acordadas no Convenio.

Décimo primeira. Publicidade e inscrición no Rexistro de Convenios

O convenio será obxecto de publicidade e inscrición de conformidade co disposto no artigo 15 da Lei 1/2016, do 18 de xaneiro, de transparencia e bo goberno.

A sinatura deste convenio suporá o consentimento expreso das partes asinantes para incluír e facer públicos os datos persoais que consten no convenio, e o resto de especificacións contidas nel, de conformidade co disposto no dito artigo 15 da Lei 1/2016, do 18 de xaneiro.

En cumprimento do disposto nos artigos 18, 20.2 e 20.8 da Lei 38/2003, do 17 de novembro, xeral de subvencións, comunicarase a subscripción deste convenio á Base de datos nacional de subvencións, que opera como sistema nacional de publicidade de subvencións.

Décimo segunda. Protección de datos de carácter persoal

As partes asinantes estarán obrigadas en materia de protección de datos a cumprir o Regulamento (UE) nº 2016/679 do Parlamento Europeo e do Consello, do 27 de abril de 2016, relativo á protección das persoas físicas no que respecta ao tratamento de datos persoais e á libre circulación destes datos e polo que se derroga a Directiva 95/46/CE (Regulamento xeral de protección de datos), a Lei orgánica 3/2018, do 5 de decembro, de protección de datos persoais e garantía dos dereitos dixitais, e as demais disposicións vixentes sobre a materia.

As partes deberán respectar o segredo profesional e, en consecuencia, manter absoluta confidencialidade e reserva sobre a totalidade dos documentos, datos e informacións que lles sexan confiados para a formalización do programa ou que sexan elaborados con ocasión da execución súa, salvo que a comunicación derive dunha obriga legal ou mandato xudicial.

A entidade colaboradora, como encargada do tratamento dos datos, ten encomendado o labor de recollida, rexistro e almacenamento dos datos persoais necesarios para a tramitación do Programa de

Apoio ao Comercio Local dos Concellos da Provincia de menos de 20.000 habitantes, garantindo expresamente respecto dos datos de carácter persoal que se traten durante a súa xestión:

- a) Que adoptará as medidas técnicas e organizativas necesarias para garantir a súa conservación e seguridade e evitar a súa alteración, perda, tratamento ou acceso non autorizado.
- b) Que non os comunicará a terceiras persoas.
- c) Que gardará o segredo profesional respecto deles.
- d) Que os utilizará única e exclusivamente para os efectos previstos neste convenio.

As obrigacións anteriormente citadas non exclúen nin contraveñen as obrigas que se citarán como condición de encargo do tratamento.

Décimo terceira. Encargado do tratamento

A Deputación da Coruña ten a condición de responsable do tratamento de datos persoais e a entidade colaboradora ten a condición de encargado do tratamento; a entidade colaboradora comprométese ás seguintes condicións:

1. Tratar por conta da Deputación da Coruña os datos de carácter persoal necesarios para a xestión dos bonos. A tipoloxía de datos tratados e as categorías de interesados serán unicamente os recollidos nesta orde. O tratamento poderá consistir na recollida, rexistro, conservación, consulta, supresión e destrución da información.
2. Utilizar os datos persoais obxecto de tratamento, ou os que recolla para a súa inclusión, só para a finalidade obxecto deste encargo. En ningún caso poderá utilizar os datos para fins propios, sendo considerado neste suposto como responsable do tratamento.
3. Tratar os datos de acordo coas instrucións do responsable do tratamento. Se o encargado do tratamento considera que algunha das instrucións infrinxe o RXPd, a LOPDGDD ou calquera outra disposición vixente en materia de protección de datos, informará inmediatamente o responsable.
4. Levar por escrito, cando proceda segundo o artigo 30 do RXPd, un rexistro das actividades de tratamento efectuadas por conta do responsable, que inclúa o contido previsto no referido artigo.
5. Non comunicar os datos a terceiras persoas, salvo que conte coa autorización expresa do responsable do tratamento, nos supostos legalmente admisibles. O encargado pode comunicar os datos a outros encargados do tratamento do mesmo responsable, de acordo coas instrucións deste último.
6. Manter o deber de segredo respecto dos datos persoais a que tivese acceso en virtude do presente convenio, mesmo despois de que finalice o seu obxecto.
7. Garantir que as persoas autorizadas para tratar datos persoais se comprometan, de forma expresa e por escrito, a respectar a confidencialidade e a cumprir as medidas de seguridade correspondentes, das que serán convenientemente informadas. O encargado manterá á disposición do responsable a documentación acreditativa do cumprimento desta obrigación.

8. Garantir a formación necesaria en materia de protección de datos persoais das persoas autorizadas para tratar este tipo de información.

9. Asistir o responsable do tratamento na resposta ao exercicio dos dereitos recoñecidos pola lexislación vixente en materia de protección de datos persoais, a través de medidas técnicas e organizativas apropiadas, para que este poida cumprir coa súa obrigaón de responder as devanditas solicitudes dos interesados nos prazos previstos pola normativa vixente. Para iso, o encargado facilitará ao responsable, por requirimento deste, e coa maior brevidade posible, canta información sexa necesaria ou relevante para estes efectos. No caso de que os afectados solicitasen o exercicio dos seus dereitos ante o encargado do tratamento, este informaraos a través de calquera medio fidedigno.

10. No caso de que para o desenvolvemento da actividade obxecto deste convenio sexa necesaria a recollida de datos directamente polo adxudicatario, este facilitará a información relativa aos tratamentos de datos que se van realizar no momento de recadar os datos. A redacción e o formato en que se facilitará a información deberase acordar co responsable e cumprirá, en todo caso, as exixencias previstas no RXPd e na LOPdGDD.

11. Notificar ao responsable do tratamento, de forma inmediata e implementando as medidas de seguridade necesarias, as violacións da seguridade dos datos persoais ao seu cargo das que teña coñecemento, xunto con toda a información relevante para a documentación e comunicación da incidencia, de ser o caso, á Axencia Española de Protección de Datos, conforme o previsto no artigo 33 do RXPd.

12. Apoiar o responsable do tratamento na realización das avaliacións de impacto relativas á protección de datos e na realización das consultas previas á autoridade de control, cando cumpra.

13. Implantar, nos casos en que aplique, as previsións recollidas no Real decreto 3/2010, do 8 de xaneiro, polo que se regula o Esquema nacional de seguridade no ámbito da Administración electrónica (ENS). En todo caso, implantaranse as medidas de seguridade necesarias para:

43.1. Garantir a confidencialidade, integridade, dispoñibilidade e resiliencia permanentes dos sistemas e servizos de tratamento.

13.2. Restaurar a dispoñibilidade e o acceso aos datos persoais de forma rápida, en caso de incidencia física ou técnica.

13.3. Verificar, avaliar e valorar, de forma regular, a eficacia das medidas técnicas e organizativas implantadas para garantir a seguridade do tratamento.

13.4. Pseudonimizar e cifrar os datos persoais, se for necesario.

14. Poñer á disposición do responsable toda a información necesaria para demostrar o cumprimento das súas obrigaóns, en particular, certificados de cumprimento da normativa expedidos por entidades acreditadas ou, en caso de non existiren, facilitando a realización das auditorías ou as inspeccións que realicen o responsable ou outro auditor autorizado.

15. Designar un delegado de protección de datos, se correspondese segundo o previsto no artigo 37 do RXPd e no artigo 34 da LOPDGDD, e comunicar a súa identidade e datos de contacto ao responsable, sen prexuízo da preceptiva inscrición na Axencia Española de Protección de Datos.

Para estes efectos, faise constar que a entidade financeira colaboradora conta cun delegado de protección de datos formalmente designado, D. Roberto Baratta Martínez, e co que o responsable do tratamento pode poñerse en contacto mediante o seguinte enderezo electrónico: privacidad@abanca.com.

16. Devolver ao responsable, unha vez cumpridas as prestacións obxecto da presente contratación, os datos persoais e, de ser o caso, os soportes onde consten. A devolución suporá o borrado total dos datos existentes nos equipamentos informáticos utilizados polo encargado. Non obstante, este último poderá conservar unha copia dos datos estritamente necesarios, debidamente bloqueados, mentres poidan derivar responsabilidades da execución da prestación.

17. Non subcontratar ningunha das prestacións que formen parte do obxecto deste convenio que comporten o tratamento de datos persoais, fóra daqueles servizos auxiliares que resulten necesarios para o normal funcionamento dos servizos do encargado ou aqueles que resulten precisos para alcanzar o bo fin do presente convenio. Neste caso, as entidades subcontratistas terán tamén a condición de encargado do tratamento e deberán cumprir igualmente as obrigacións establecidas neste convenio para esta figura e as instrucións que dite o responsable do tratamento. Á entidade bancaria colaboradora corresponderalle regular a nova relación de forma que o novo encargado quede suxeito ás mesmas condicións (instrucións, obrigacións, medidas de seguridade...), ao mesmo réxime de responsabilidade e cos mesmos requisitos formais que o encargado inicial, no referente ao adecuado tratamento dos datos persoais e á garantía dos dereitos das persoas afectadas.

Décimo cuarta. Comisión de Seguimento

Coa finalidade de asegurar o cumprimento deste convenio constituirase unha comisión paritaria de seguimento que adoptará os seus acordos por consenso e estará integrada por dúas persoas representantes da Deputación da Coruña e dúas en representación da entidade colaboradora.

A Comisión constituirase por petición de calquera das partes e as súas funcións serán velar polo cumprimento do convenio e propoñer as medidas necesarias para garantir o exercicio coordinado das competencias de cada unha das partes.

En todo o non especificamente previsto sobre o funcionamento desta Comisión serán de aplicación as normas sobre órganos colexiados previstas na Lei 40/2015, do 1 de outubro, de réxime xurídico do sector público. A propia comisión, unha vez constituída, decidirá o réxime das súas reunións.

Décimo quinta. Vixencia

Este convenio de colaboración entrará en vigor o día da súa sinatura e os seus efectos estenderanse ata o 31 de decembro de 2025.

Décimo sexta. Natureza xurídica, réxime xurídico e xurisdición competente

Este convenio ten natureza administrativa e considérase incluído no artigo 4 da Lei 9/2017, do 8 de novembro, de contratos do sector público, polo que queda fóra do seu ámbito de aplicación, ben que se aplicarán os principios e criterios do dito texto legal para resolver as dúbidas e lagoas que se poidan presentar.

O convenio rexerase polas súas propias cláusulas e, ademais, polos preceptos básicos da Lei 38/2003, do 17 de novembro, xeral de subvencións, polo Real decreto 887/2006, do 21 de xullo, que a desenvolve, pola Lei 9/2007, do 13 de xuño, de subvencións de Galicia, a Lei 7/1985, do 2 de abril, reguladora das bases do réxime local, Lei 1/2016, do 18 de xaneiro, de transparencia e bo goberno, Lei 39/2015, do 1 de outubro, do procedemento administrativo común das administracións públicas, e Lei 40/2015, do 1 de outubro, de réxime xurídico do sector público.

Así mesmo, seranlle de aplicación as demais normas de dereito administrativo aplicable ou, na súa falta, as derivadas do dereito privado.

En consecuencia, correspóndenlle á Deputación da Coruña, as prerrogativas de interpretación, modificación, resolución, reintegro e nulidade deste convenio, así como resolver as dúbidas que xurdan sobre o seu cumprimento. Os acordos correspondentes porán fin á vía administrativa, serán inmediatamente executivos e serán impugnables ante a xurisdición contencioso-administrativa.

Este convenio obriga ao cumprimento do expresamente pactado e as partes sométense ao acordado en todas as súas estipulacións.

Faise constar que o presente convenio foi aprobado por Resolución de presidencia número 43173 de 18 de setembro de 2025.

E en proba de conformidade, asinan por duplicado o presente convenio, no lugar e data indicados no encabezamento.

**A REPRESENTANTE DA
DEPUTACIÓN PROVINCIAL DA CORUÑA**

**O REPRESENTANTE DE
ABANCA CORPORACIÓN BANCARIA S. A.**

Asdo. Rosa Ana García López

Asdo. Álvaro Manuel Rodríguez Cabo

**O SECRETARIO XERAL DA
DEPUTACIÓN PROVINCIAL DA CORUÑA**

Asdo. Miguel Iglesias Martínez